



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2019. GODINU SNAGE EKONOMSKOG POKRETA U BOSNI I HERCEGOVINI

Broj: 03-07-6-296/20  
Sarajevo, 24.08.2021. godine

## SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole.....	5
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE.....	5
5. NALAZI I PREPORUKE REVIZIJE.....	5
5.1 NALAZI.....	5
5.2. PREPORUKE.....	6

## **MIŠLJENJE REVIZORA**

Služba za reviziju finansiranja političkih stranaka izvršila je pregled godišnjeg finansijskog izvještaja Snage ekonomskog pokreta u Bosni i Hercegovini za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2019. godinu, utvrđeno je da je politička stranka Snaga ekonomskog pokreta u Bosni i Hercegovini prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.**

**Pregledom, odnosno kontrolom finansijskih izvještaja, osim gornjih napomena nismo zapazili ništa značajno, što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled finansijskog izvještaja Snage ekonomskog pokreta u Bosni i Hercegovini za 2019. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2019. godinu, Snaga ekonomskog pokreta u Bosni i Hercegovini se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	0,00	0,00
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	666,40	100,00
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>666,40</b>	<b>100,00</b>
<b>II</b>	<b>Ostali prihodi i drugo</b>	<b>0,00</b>	<b>0,00</b>
	<b>Izvori finansiranja (I+II)</b>	<b>666,40</b>	<b>100,00</b>

U godišnjem finansijskom izvještaju stranka je iskazala rashode u ukupnom iznosu od 859,90 KM.

## 2. PREDSTAVLJANJE POLITIČKE STRANKE

Naziv političke stranke je Snaga ekonomskog pokreta u Bosni i Hercegovini. Skraćeni naziv stranke je SEP u BiH.

Politička stranka, pod nazivom Novi ekonomski pokret u BiH je registrovana 09.03.2010. godine kod Općinskog suda u Tuzli i u sudski registar upisana pod brojem: 032-0-Reg-10-000231. Rješenjem Općinskog suda u Sarajevu, broj: 065-0-F1-11-000009 od 26.04.2012. godine, promijenjen je naziv političke stranke, sjedište stranke i imenovano je novo lice za zastupanje i predstavljanje. Stranka je u registar suda upisana pod nazivom Snaga ekonomskog pokreta u Bosni i Hercegovini. Rješenjem Općinskog suda u Tuzli broj: 032-0-Reg-18-001276 od 23.08.2018. godine, upisana je izmjena sjedišta i lica ovlaštenog za zastupanje stranke.

Sjedište stranke u Gradačcu, ul. Husein Kapetana Gradašćevića bb.

Lice ovlašteno za zastupanje i predstavljanje političke stranke u 2019. godini je Jusuf Golać, predsjednik stranke.

Lice ovlašteno za podnošenje finansijskih izvještaja za 2019. godinu je Jusuf Golać.

U godišnjem finansijskom izvještaju za 2019. godinu, Snaga ekonomskog pokreta u Bosni i Hercegovini je iskazala sljedeću organizacionu strukturu:

- Središnji ured stranke u Sarajevu i
- Općinski odbor Gradačac.

### **3. OPIS PREGLEDA I KONTROLE FINANSIJSKOG IZVJEŠTAJA**

**Predmet pregleda i kontrole** je godišnji finansijski izvještaj Snage ekonomskog pokreta u Bosni i Hercegovini za 2019. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskih izvještaja Snage ekonomskog pokreta u Bosni i Hercegovini obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja.

### **4. PRETHODNE KONTROLE I REVIZIJE**

Služba za reviziju je izvršila pregled i reviziju godišnjih finansijskih izvještaja ove političke stranke u periodu od 2010. do 2018. godine, nakon kojih je izdala izvještaje o pregledu i reviziji sa mišljenjem revizora, nalazima revizije i preporukama.

Nakon obavljene revizije godišnjeg finansijskog izvještaja za 2018. godinu, izdat je izvještaj o reviziji sa mišljenjem revizora, nalazima revizije i preporukom političkoj stranci da poslovne knjige vodi u skladu sa računovodstvenim propisima, odnosno da vodi pravilne evidencije o rashodima i obavezama.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2019. godinu, utvrđeno je da Snaga ekonomskog pokreta u Bosni i Hercegovini nije ispoštovala date preporuke.

### **5. NALAZI I PREPORUKE REVIZIJE**

#### **5.1 NALAZI**

**Snaga ekonomskog pokreta u Bosni i Hercegovini prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.**

Na osnovu obavljenog pregleda godišnjeg finansijskog izvještaja i dodatne dokumentacije, utvrđeno je da Snaga ekonomskog pokreta u Bosni i Hercegovini nije uspostavila potpune evidencije o svojim rashodima i obavezama i nije popunila obrasce finansijskog izvještaja u skladu sa Pravilnikom o godišnjim finansijskim izvještajima političkih stranaka (u daljem tekstu: Pravilnik), čime su prekršene odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

- Snaga ekonomskog pokreta u Bosni i Hercegovini je u toku 2019. godine platila naknadu za prijem Završnog računa za 2017. godinu u iznosu od 70,00 KM i naknadu za prijem Završnog računa za 2018. godinu u iznosu od 70,00 KM, te je u poslovnim knjigama i godišnjem finansijskom izvještaju iskazala troškove u iznosu od 140,00 KM.

Stranka, međutim, u poslovnim knjigama i godišnjem finansijskom izvještaju nije iskazala troškove knjigovodstvenih usluga (vođenje poslovnih knjiga i izrada Završnog računa) niti obaveze po istom osnovu, čime je prekršila odredbe člana 21, 22. i 24. Pravilnika.

- Stranka je promet ostvaren putem transakcijskog računa broj: 1321002008639730 iskazala u manjem iznosu za 459,74 KM u odnosu na ostvareni, čime je prekršila odredbe člana 11. Pravilnika.

Naime, stranka je u obrascu 2 (pregled prometa svih transakcijskih računa političke stranke) godišnjeg finansijskog izvještaja iskazala ukupan promet ulaza u iznosu od 641,24 KM, odnosno ukupan promet izlaza u iznosu od 641,24 KM. Uvidom u izvode sa transakcijskog računa utvrđeno je da je ukupan promet ulaza iznosio 1.100,98 KM, odnosno ukupan promet izlaza 1.100,98 KM.

- U obrascu 5.2 (ostale obaveze) godišnjeg finansijskog izvještaja stranka nije iskazala obaveze po osnovu zakupa poslovnog prostora u iznosu od 700,00 KM, čime je prekršila odredbe člana 24. Pravilnika.

## **5.2. PREPORUKE**

*Preporučuje se političkoj stranci Snaga ekonomskog pokreta u Bosni i Hercegovini da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da poslovne knjige vodi u skladu sa računovodstvenim propisima, odnosno da vodi pravilne evidencije o rashodima i obavezama i*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.*

### **KOMENTAR:**

U ostavljenom roku, politička stranka Snaga ekonomskog pokreta u Bosni i Hercegovini nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2019. godinu.

Šef Odsjeka za revizijske poslove, revizor

Sanja Tošović

šef Službe za reviziju

Mr. sc. Hasida Gušić